



## Ақмешіт

20 сәуір  
сенбі

№31 (2041)

2024 жыл

## апталығы

Газет  
1994 жылдың 15 сәуірінен  
бастап шығады

• Қалалық қоғамдық-саяси әлеуметтік-  
ақпараттық тарихи-танымдық газет •  
E-mail: akmeshit.kz@mail.ru

# АРАЛ ТЕҢІЗІНІҢ ҚҰРҒАҒАН ТАБАНЫ «ЖАҢА ДӘУІР МҰНАЙЫНЫҢ» КӨЗІ МЕ?

Сарапшылар «электроника дәуірінің мұнайы» деп атаған литий өндірісіне әлем көз тігіп отыр. Дүниежүзілік банктің есебіне сүйенсек, 2050 жылға қарай таза энергия көздеріне сұраныс арта түспек.

Алдағы уақытта сирек кездесетін металдар, әсіресе, мыс, графит, литий, кобальт сынды минералдардың өндірісі 500 пайызға ұлғаюы мүмкін деп болжануда. Оның ішінде литийге деген сұраныс жоғары. Қаржы сарапшысы Асылхан Андәшевтің «Курсив» газетіне берген пікіріне сүйенсек, 1991 жылы Sony компаниясы алғашқы литий-иондық батарея шығарғаннан бастап литий электроника саласында жоғары сұранысқа ие шикізатқа айналды. 1995 жылы әлемдік литий өндірісі 9,5 мың тоннаны құрап, оның 37 пайызын АҚШ өндірді. Қазіргі таңда әлемдік литий өндірісі 100 мың тоннадан асып жығылып, өндіру жағынан Аустралия алға шықты. Әлемдегі литий өндірісінің 90 пайызын Аустралия, Чили және Қытай өндірсе, АҚШ үлесі 1 пайыз ғана. Сарапшының айтуынша, литийге деген сұраныс соңғы онжылдықта ғана қатты өскендіктен әлемдегі қоры әлі де дұрыс зерттелмеген.

Кейінгі жылдары литий өндірісіне Қытай мемлекеті қатты қызығушылық танытуда. Сирек кездесетін қымбат металл түрін өндіруге білек сыбана кіріскен қытайлықтар өз жерінде ғана емес, Африка елдеріндегі литий кен орындарына инвестиция құюды ұлғайта түскен. Осы орайда Қытай литий өндірісіне соншалықты



неге қызықты деген сұрақ туындайтыны заңдылық. Тағы да сарапшылар пікіріне сүйенсек, әлем бойынша ең ластанушы ел қатарына жататын Қытай экологиялық таза көлік өндіруді қарқынды дамытуда. Ал бұл өндіріске литий аса қажет. Сол себепті де қытайлықтар өзіндегі ғана емес, өзге елдегі кен орындарына қаржы құюда. Ақпарат көздерінде жарияланған деректерге сүйенсек, қазіргі таңда осы

металдың көп бөлігі тікелей электроника саласына пайдаланылуда. Мәселен, 2010 жылы өндірілген литийдің 27 пайызы ғана электроника саласында қолданылса, қазіргі таңда 74 пайызға жеткен. Жалпы литий өндірісіне жалғыз Қытай ғана емес, әлемде экономикасы жағынан көшбасшы елдер көз тігіп, тіпті бәсекелестік пайда болған десек, артық емес. Еуропа елдерінде, оның ішінде Франция, Германия, Сербия сияқты

елдерде литий өндіру жолға қойылуда. Себебі де белгілі. Соңғы жылдары әлем көміртен бас тартып, экологиялық таза энергия тасығыштарға назар аударуда. Бұл мақсатта өзге шикізаттармен қатар литийдің орны бөлек. Жоғарыда айтып өткеніміздей әлемде электромобильдер паркі көбейіп келе жатқаны белгілі. Ал экологиялық таза көліктің қуат көзі – литий-ионды аккумулятор.

2-БЕТТЕ

Қалалық мәслихаттың мәжіліс залында Қазақстан Республикасы Парламенті Сенатының депутаттығына кандидаттармен кездесу өтті.

## СЕНАТ: үміткер үшеумен кездесу

Қалалық мәслихат төрағасы И.Құттықожаев төрағалық еткен жиынға облыстық және қалалық мәслихат депутаттары, ардагерлері кеңесі, қалалық жастар ресурстық орталығы басшылары, БАҚ өкілдері қатысты.



Естеріңізге сала кетсек, биыл 25 сәуірде Қазақстан Республикасы Парламенті Сенатының Қызылорда облысынан шығып қалған депутаттың орнына сайлау өтеді. Заңнамаға сәйкес Сенат депутаттары жасырын дауыс беру арқылы жанама сайлау құқығы негізінде сайланады. Ол дегеніміз, Парламент Сенатының депутаты сайлауға дауыс беруге тек сайлаушы ретінде мәслихат депутаттары қатысатынын білдіреді.



Кездесу барысында Қазақстан Республикасы Парламенті Сенатының депутаттығына үміткерлер Н.Байқадамов, А.Есмаханов, А.Жүнісов өздерінің сайлауалды бағдарламасымен таныстырды.



Ел аманатын арқаулауға ниет білдіріп отырған үміткерлерге депутаттар тарапынан сауалдар қойылып, тұшымды жауаптар алынды. Үміткерлердің бағдарламаларында аймақтағы басты мәселелер назарға алынған.

Г. АСҚАРҚЫЗЫ

## СЫРБОЙЫЛЫҚТАРДЫҢ ҚАМҚОРЛЫҒЫ

Сын сағатта күш біріктіру – ата салтымыздан келе жатқан мызғымас қағида. Айтып келмейтін апаттан еліміздің он аймағы топан судың астында қалып, қиындыққа душар болды.

Сыр елінің халқы су тасу қаупі туындаған Атырау қаласынан келген 93 азаматқа қолдау көрсетіп, қалалық жұмыспен қамту және әлеуметтік бағдарламалар бөліміне қарасты Зейнеткерлерге жартылай стационарлық жағдайда арнаулы әлеуметтік қызметтер көрсету орталығына 59 адамды, И.Әбдікәрімов атындағы Қызылорда аграрлық-техникалық жоғары колледжінің жатақханасына 34 адамды




орналастырды. Атыраулық қонақтардың барлық қажеттіліктерін жергілікті әкімдік қамтамасыз етеді. Жауапты мамандардың айтуынша, атыраулық қонақтарға 3 мезгіл ыстық тамақ беріліп, дәрігерлер бақылауға алған. Қонақтардың ұсақ-түйек қажеттіліктерін жеткізіп беруді «АМАНАТ» партиясының облыстық филиалы қадағалауда. Жағдайды тұрақты бақылау үшін жауапты басқарма мамандары екі жаққа да арнайы барып, ахуалды назарда ұстауда.

Бұған қоса, Батыс Қазақстан облысынан өңірге 100-ден аса оқушы демалысқа келген еді. Олар Арал ауданындағы «Камбаш» олимпиадалар және қосымша білім беру орталығына орналастырылды.

– Оралдық балалар 10 күн бойы аталған орталықта білім мен тәрбие ғана алып қоймай, түрлі мәдени-сауықтыру іс-шараларына қатысуда. Оқушылардың әр сағаты алдын ала жоспарланып отыр. 5 мезгіл тамақ қарастырылған. Сонымен қатар ауданның тарихи-мәдени орындарына, киелі жерлеріне саяхат жасайды, – дейді облыстық білім басқармасының басшысы Асқарбек Есжанов.

Г. АСҚАРҚЫЗЫ



Қалалық мәслихаттың әлеуметтік сала және қоғамдық қауіпсіздік мәселелері жөніндегі тұрақты комиссиясының кезекті отырысы өтті.

## МЕКТЕП АСХАНАЛАРЫ ТАЛАПҚА САЙ МА?



Алдымен халық қалаулылары, сала мамандары мен БАҚ өкілдері «Бәйтерек» тұрғын ауданында орналасқан №287 мектебіне барды. Онда оқушыларды тамақтандыруды ұйымдастыру мәселесін зерделеп, сала мамандарына тиісті ұсыныстарын енгізді. Зерделеу барысында депутаттар тарапынан №287 мектептің шатырынан су кетуі және қосалқы жарық қондырғысы орнатылмауына байланысты мердігер мекемеге тиісті тапсырмалар берілді.

Мұнан соң комиссия жұмысы қалалық мәслихатта атаналар, мектеп басшыларының қатысуымен күн тәртібіндегі мәселелер кеңінен талқыланды. Отырыстың күн тәртібіне «Жасөспірімдер мен кәмелетке толмағандар арасында тәрбие беру жұмыстары мен құқық бұзушылықтардың алдын алу туралы», «Қала бойынша мектеп асханаларының жай-күйі мен оқушыларды тамақтандыруды ұйымдастыру және сапасы туралы» мәселелері қаралды.

2-БЕТТЕ



## ОРТАЛЫҚ АЛАҢ ҚАШАН АШЫЛАДЫ?

Бұл көпшіліктің көкейінде жүрген сұрақ.

Осы мақсатта біз алаңға барып, жұмыс барысын көрдік. Бірнеше айдан бері айналасы қоршалған алаңдағы қайта жаңғырту жұмыстары қарқынды жүргізілуде. Қазіргі таңда жұмыстың 70 пайызы аяқталды. Мамандар осылай дейді.

4-БЕТТЕ





